

Jangan permainkan taubat, ulangi kemungkaran

Apabila ada umat Islam yang terlalai sehingga sanggup memperdagangkan akidah, ia bukan menjadi tanggungjawab individu itu semata-mata untuk kembali ke pangkal jalan, tetapi juga menjadi tanggungjawab masyarakat di sekelilingnya.

Negara memainkan peranan lebih besar sama ada melalui undang-undang atau menggalakkan pembinaan budaya menghormati agama dan penganutnya untuk memastikan umat Islam istiqamah

dengan pegangan agama.

Sudah namanya manusia, sering melakukan kesilapan dan kesalahan. Ada yang disengaja, ada pula yang tidak disedari tetapi akhirnya mengorbankan akidah dengan men-duakan Allah SWT. Ada yang suka mempersenda hukum Ilahi.

Negeri akhirat itu pasti, kepada yang tidak mensia-siakan kehidupan di dunia dengan kezaliman terhadap diri sendiri, pastilah kegembiraan menanti tetapi jika sebaliknya tentulah balasannya tidak tertanggung.

Tidak ulangi kesalahan

Akal yang dikurniakan Allah SWT adalah untuk berfikir supaya kita tidak mengulangi kesalahan yang serupa berulang kali sehingga menggagalkan misi dan visi sebagai hamba di dunia ini. Menyesali dosa yang telah dilakukan dan berazam bersungguh-sungguh untuk tidak mengulanginya lagi adalah usaha perlu dilakukan jika benar-benar ingin bertaubat.

Allah SWT berfirman yang bermaksud: *“Wahai orang yang beriman! Bertaubatlah kamu kepada Allah dengan taubat nasuha, mudah-mudahan Allah akan menghapuskan kesalahan kamu dan memasukkan kamu ke dalam syurga yang mengalir di bawahnya beberapa sungai.”* (Surah at-Tahriim, ayat 8)

Jangan pula taubat dipermainkan

dengan mengulangi dosa dan kemungkaran yang telah dilakukan. Sesiapa yang ingin bertaubat mestilah menyesali dosa-dosa yang telah dilakukan dan bertekad untuk tidak mengulanginya lagi.

Inilah yang dikatakan menyucikan diri, iaitu kita menghilangkan segala kotoran terlekat di hati, mudah-mudahan kebaikan itu mendorong kepada pembersihan jiwa yang sebenar. Kita juga harus berjanji untuk mengelak daripada melakukan dosa selagi hidup.

Seboleh-bolehnya hidup hendaklah dipandu dengan garis panduan yang telah dimuktamadkan oleh Allah SWT dan Rasul-Nya yang sememangnya membantu kita menggapai sebuah kebahagiaan hakiki yang abadi.



**NIK SALIDA
SHUHAILA**